


ORATIO
IN FVNERE
• REVERENDISSIMI DOMINI
IOANNIS MIRÆI
IV. ANTVERPIENSIVM
EPISCOPI:

Habita xvi. Ianuarij M. DC. XI.
à R. D. IOANNE DEL-RIO
Protonotario Apostolico, Ecclesiæ
Cathedralis Antwerp. Decano,
& Episcopatus eiusdem Vicario Generali.



ANTVERPIÆ,
EX OFFICINA PLANTINIANA,
Apud Viduam & Filios Io. Moreti.
M. DC. XI.

O R A T I O³
 IN FVNERE
 REVERENDISSIMI DOMINI
 IOANNIS MIRÆI
 IV. ANTVERPIENSIVM
 EPISCOPI.



ÆCILIUS Metellus,
 cognomento Macedo-
 nicus, cū tristem de
 inopinata Scipionis A-

fricani morte nuntium accepisset, in
 hanc vocem prorupit: *Concurrite, con-*
currite ciues Romani; vrbis enim nostræ
mœnia conciderunt. Idē nobis hodierno
 die veriùs ac iustiùs licet exclamare:

Concurrite, concurrite ciues Antuer-
 piani: murus & antemurale nostrum
 IOANNES MIRÆVS, Antistes vi-
 gilantissimus, cecidit; mœnia vrbis
 nostræ periclitantur: hostis vndique

Val. Max.
 lib. 4 cap. 1.

A 2 nobis

nobis infidiatur : lapidem omnem
mouet, vt Ecclesiæ vrbisq; nostræ
statum euertat. Et (heu!) cecidit, qui
vnus nos protegere, ac tueri poterat,
quiq; solidum aduersus hostes pro-
pugnaculum cælitus datus videba-
tur. Hæc, inquam, iure nobis inge-
minare liceat, quòd tot tantaq; ex-
stent optimi Præsulis in Ecclesiam
vrbemq; istam merita, vt iure opti-
mo PATER PATRIÆ nuncupari
posse videatur. Testandæ itaque gra-
titudinis causa, Viri admodum Re-
uerendi ac Clarissimi, dicam breuiter
de IOANNIS MIRÆI Præsulis
vigilantissimi vita ac moribus, hoc
est, de singularibus atq; eximiis eius
virtutibus; & perfecti vobis Sacerdo-
tis atque Episcopi exemplar ante o-
culos proponam. Quod dum facio,
maiores in modum rogo, vt me de
eius, quem viuum parentis loco co-
luistis, iam defuncti laudibus dicen-
tem attentè patienterq; audiatis.

Atque

Atque vt ab ipsis vitæ incunabulis
 Orationis meæ filum ordiar, Natus
 est IOANNES MIRAEVS Bruxellæ,
 quæ Principum sedes est ac palatium,
 honestissimis parentibus, & religio-
 nis Catholicæ à Maioribus acceptæ
 studiosissimis, anno partæ salutis
 M. D. LX. festo ipso Epiphaniæ die,
 non sine omine, vt qui magnam ali-
 quando lucem Diœcesi Antuerpien-
 si, ab hæreticis pænè oppressæ, toti-
 q; adeò Belgio esset allaturus. Ru-
 dimenta litteraria hausit ibidem a-
 pud fratres Hieronymianos, qui tum
 celeberrimas per Belgium scholas
 passim habebant. Ætate proue-
 ctior, Louanium à parentibus mis-
 sus est: vbi Philosophiam in pæda-
 gogio Castrensi sedulò audiuit. Re-
 bus exinde per Belgium turbatis,
 tempore Ioannis Austriaci, Acade-
 miam Louaniensem relinquere est
 coactus. Quid faceret? studiorum fi-
 lum ægrè admodum abrumpebat.

A 3

Dua-

Duacum itaque profectus, in Collegio Regio intermissum Philosophiæ curriculum profecutus est, adeò quidem feliciter, vt Artium magister, secundam lauream inter sodales suos ac cōpetitores obtinuerit. Ad eam nunc ætatem peruenerat, qua de certo vitæ genere amplectendo, certum quid esset statuendum. Atque ea quidem deliberatio, vt omnium solet esse difficillima, sic multæ & anticipites cogitationes fluctuantem adolescentis animum mirè exagitarūt. Erant qui ad Iurisprudentiam inuitarent: alij ad Medicinam animum vt appelleret suadebant. Cum Reuerendis itaque Societatis I E S V Patribus communicato consilio, deliberationem omnem ad Deum referendam censuit; eoque precibus ac meditationibus demum consulto, ad Ecclesiasticum vitæ genus vocari se ac trahi sensit. Diuinæ autem vocationi tanto promptiùs parendum existi-

existimauit , quòd eo tempore totum ferè Belgium , excepta Artesia, Hannonia , & aliis aliquot prouinciis , mirum in modum à Caluinianis turbaretur , veterisque Belgij ne quidem facies appareret. Ceterùm priusquam Theologiæ sese studio totum deuoueret , humaniores primum litteras, cùm Græcas tum Latinas , quæ altioribus illis disciplinis non ornamento modò , sed & adiumento esse solent , penitiùs imbibit, illas à limine salutasse minimè contentus : quoque faciliùs id assequi posset , annos tres Eloquentiam & Græcas in Collegio Regio litteras professus est; ratus , id quod res est, fore, vt hisce iactis fundamentis , altiorum disciplinarum fastigia solidiùs consisterent. Confluebant tunc ex Brabantia, Geldria, Flandria, Hollandia, Zelandia ac Frisia adulescentes plurimi Duacum , velut ad mercatum bonarum artium. Qui-

bus omnibus ac singulis vt prodesse totumque sese dare posset, eiusdem Collegij Regij præfecturam suscepit. Et florent hodie cum in Ecclesia tum in hac Republ. nostra non pauci, qui tali se vfos doctore ac moderatore non immeritò gloriantur.

His itaque armis instructus Præsul noster, ad sacrosancta Theologiæ arcana inuestiganda accessit; & celeberrimos Sacrarum litterarum Professores, viros eximios, Matthiam Bossemium, Thomam Stapletonum, Guilielmum Estium, & Bartholomæum Lintrensem, assidue audiuit; quibus & gratissimus ob ingenium ac diligentiam semper fuit. Et ne curâ aliquâ distraheretur, ad Seminarium Regium, quod ob utilissimas sub Guilielmo Estio exercitationes mirificè tunc efflorescebat, se contulit. Moxque adeò profecit, vt Disputationibus Theologicis, publicè in Academia haberi solitis, titulo Prioris

ris vacantiarum præesse iussus sit: nec multo pòst meritam in sacra Theologia lauream adeptus.

Anno M. D. LXXV. creatus Sacerdos, cùm Antuerpiam, Bruxellam, aliaque Brabantia ac Flandriae opida Alexander Farnesius Dux Parmensis ad obsequium Regi Catholico debitum compulisset, adeoque messis esset multa, operarij verò pauci, de functione pastoralis amplectenda seriò cogitavit. Rotnacensem itaque Decanatum, ab Ill^{mo} ac Reu^{mo} IOANNE HAVCHINO Mechliniensium Archiepiscopo, sibi ob doctrinam ac pietatem amicissimo, oblatum, recusavit; & Canonicatum cathedralis Ecclesie Namurcensis, quem nactus fuerat, sponte deseruit: factus paulò pòst Pastor Bruxellæ in basilica S. Iacobi iuxta Principispalatium, ac demum S. Gudilæ eadem in vrbe Canonicus. Longum foret commemorare, quàm utilis non solum

A 5 popu-

populo Bruxellensi, sed & proceribus aulicis fuerit, dum aliorum iurgia ac contentiones, quæ in Principum aulis frequentes esse solent, singulari industriâ componit; aliorum corruptos ac deprauatos mores corrigit: vniuersis denique verbo præit atque exemplo. Quo factum, vt toti aulæ, atque ipsi etiam Ill^{mo} ac Reu^{mo} Archiepiscopo Mechliniensi MATTHIAE HOVIO, & IOANNI RICHARDOTO sanctioris consilij Præfidi, longè gratissimus extiterit. Quin imò cum ab his duobus viris amplissimis, aliisque, non semel ad Sereniss. ARCHIDUCEM, PRINCIPEM nostrum optimum, de MIRAEI virtute, eruditione, atque in rebus cum publicis tum priuatis procurandis facilitate ac solertia, relatum esset; Ill^{mo} GVILIELMO A BERGIS ad Archiepiscopatum Cameracensem euecto, noster inopinatò, nec tale quidpiam ambiens, Gandauum anno

IN FVNERE EPISCOPI. II
no M. D C. II. mense Iulio ab eodem
Sereniss. PRINCIPE euocatur. Offer-
tur illi Episcopatus Antuerpiensis :
sed hæret ipse , & onus Angelicis
etiam humeris formidandum (si san-
cto Ioanni Chrysostomo credimus)
modis omnibus subterfugere cona-
tur. Instat Sereniss. PRINCEPS: vrget
Illustriss. Archiepiscopus: quin imò
Pontifex ipse Romanus CLEMENS
VIII. seriò monet atque hortatur
per Ill^lum OCTAVIVM Tricaricen-
sem Episcopum , tunc Apostolicum
apud Belgas Nuntium. Deliberatio,
utpote grauissima , non in septima-
nas, sed in biennium ferè totum pro-
trahitur: adeò quidem vt Sereniss.
ipse PRINCEPS noster gauderet ac
miraretur tales in Prouinciis suis vi-
ros reperiri , qui oblatum in vrbe
amplissima Episcopatum recusarèt,
raro nimirum atque inusitato huius
æui exemplo. Sic olim *S. Nicolaus*
Myrensis Episcopus vehementer pri-
mum

mum repugnauit: sic *Gregorius Nazianzenus* delatam sibi tiam ac pedum repudiauit. Quid? *Ioannes Chrysostomus* quàm constanter munus istud arduum per se ac difficile defugerit, testantur aurei illi de Sacerdotio libri, quos posteritati reliquit. Taceo reliquos Græciæ Antistites: sunt enim plurimi. In Italiam transco. *Gregorius* verè *Magnus* Pontificiam dignitatem adeò detrectauit, vt in cœnobium se accellam tamquam in asylum abderet. Omitto *Ambrosium* Mediolanensem, *Martinum* Turonensem, Episcopos; qui inuiti ad Episcopatum tracti sunt. Silco *S. Bernardum*, *S. Thomam Aquinatem*, *S. Vincentium Ferrerium*, reliquos; qui singuli non singulas, sed plures ordine Episcopales mitras forti atque excelso animo declinarunt.

At verò dum *MIRAEVS* noster in deliberatione versatur, haudquam otiosus fuit. Magna tunc erat
fama

fama miraculorum B. VIRGINIS
 Aspricollis apud Sichemium Brabā-
 tiæ opidum : multus ac frequens ho-
 minum piè peregrinantium ex vni-
 uerso Belgio confluxus. Viro opus
 erat & prudente & solerti, ad varia,
 quæ tum spargebantur, maturè dis-
 quirenda, & ad miraculorum verita-
 tem cum iudicio explorandam. Ita-
 que *ne fraus aut fucus imponeret* (Iusti
 Lipsij verbis utar) *publico mandato Il-*
lustrissimi Mechliniensium Antistitis ex-
plorata ea atque inquisita, à Reueren-
dissimo Antuerpiensi Episcopo IOANNE
MIRAEI; qui & scripto ea cum fide
& industria digessit & consignauit. Ab
illo hausit postmodum sua Lipsius, vt
 ipse ingenuè profitetur. DEIPARAE
 verò, MIRAEI pietas ac diligentia
 summopere placuit : nec clienti illa
 suo defuit. Cùm enim in eius quasi
 sinu omnem de Episcopatu delibe-
 rationem deposuisset, ad cum am-
 plectendum diuinitus impelli quo-
 dam-

Lips. in
 præfat. ad
 Lect. de
 Diua Si-
 chemienſi.

dammodò se sensit. DEO itaque auspice, DEIPARA patrocicante (quam & testamenti tabulis patronam semper sibi fuisse affirmat) Superioribus mandantibus, præsentè eaquè gravissima Ecclesiæ necessitate cogente, onus Pontificium tandem suscepit; & anno M. D C. I V. die xxx. mensis Maij, Quartus huius vrbis Episcopus solemnè Ecclesiæ ritu est consecratus. Quo factò, nihil duxit antiquius, quàm Religionem Orthodoxam propagare, hèreses extirpare, lupos ab ouilibus arcere, monasteria belli tumultibus solo æquata instaurare, deniq. pristinam omnem Ecclesiæ disciplinam ac faciem reuocare.

Itaque ne vineæ Domini exercituum operarij deessent, qui manipulos ac segetes colligerent, *Seminarium* Dicoecesanum Antuerpiæ, ex Tridentinæ Synodi decreto, à prædecessoribus suis inchoatum, sic auxit atque amplificavit, vt illius FV N-

DATOR

IN FVNERE EPISCOPI. 15

DATOR meritò nuncupari posse videatur. nam præter census annuos, de Professoribus quoque ipsis Seminarij alumnis prouidit ; auctorque exstitit Reuerendis Societ. I E S V Patribus, vt in hac vrbe lectiones Theologicas instituerent, & Casus conscientiaë, fideique Controuersias aduersus Nouatores explicarent. Atque vt suis animum adderet, Disputationibus ipse Theologicis, etsi negotiorum ponderibus oppressus, non interfuit modò, sed & de rebus controuersis eruditissimè disseruit. Ex hoc Seminario plurimi per Diocesim Parochi prodire; iis, qui ob temporum iniquitatem vitæ hæctenus fuerant liberioris, suffecti. Ex hoc non pauci ad Academiam quoque Duacenam ab ipso sunt missi, plenius ac perfectius ibidem instituendi. Quid referam concionandi ardorem & studium? quo quidem, vt verbo dicam, verum se Episcopum, & canem pro domo

domo Dei latrantem ostendebat. Quid memorem zelum propè singularem in Christianæ doctrinæ rudimentis rudi iuventuti per Catechistas instillâdis? quid SCHOLAS DOMINICALES, ab ipso in vsum pauperum erectas? Quid Patres A V G V S T I N I A N O S, quid ANNÛNTIATAS virgines, velut nouas colonias in urbem deductas? Quid denique SYNODVM DIOECESANAM, mense Maio anni superioris celebratam, typisq̃ue Plantinianis euulgatam? Quæ quidem omnia eò dirigebat, vt gregem sibi creditum ad perfectam Christianæ vitæ normam duceret, atque in auita Religione retineret.

Vnum hîc filere nec possum, nec debeo. Cùm ante biennium in hac vrbe de Induciis cum Ordinibus Confœderatis paciscundis ageretur, fortissimè apud Serenissimũ P R I N C I P E M nostrum, eiusq̃ue Consiliarios,

rios ; institit ; ostenditque concludi eas haud quaquam posse, nisi SALVA MAIORVM RELIGIONE. Ipso itaque procurante factum , vt Legati HENRICI IV. Regis Christianissimi , solemnī scripto dato , sponderent Religionem Orthodoxam fore illæsam , per vniuersam Brabantiam , in ipsis etiam municipiis ac pagis *Bredæ & Bergis ad Zomam* adhærentibus. Cumque postea pestilentis cathedræ Ministri solempne illud Legatorum scriptum euertere , & per pagos zizania sua disseminare conarentur , graui suo sumptu nepotem suum AVBERTVM MIRAEVM collegam nostrum in Batauiam primò , ac deinde in Galliam ad PETRVM IANNINVM Præsidem misit , vt impiis hæreticorum conatibus tempestiuè occurreret. Vnius itaque Antistitis diligentiae debemus , quòd Catholici hodie Pastores ipsis etiam hæreticorum in

B . . . portis

portis excubant , quòd ab iisdem pagis Calvinianorum Ministri sint exclusi, quòd denique multa hominum millia Religionem in illo tractu retineant Orthodoxam.

Restat vt de virtutibus, quas in Episcopo Paulus Apostolus desiderat, aliquid dicamus. Eæ profectò in hoc præstantissimo viro sic emicuerunt, vt planè *lux mundi* fuerit, *exemplum fidelium & forma gregis*: alter quasi PAVLVS factus omnia omnibus, vt omnes Christo lucrificeret. *Pontifex gravis & cordatus* (qualem Chrysostomus lib. VI. De sacerdotio describit) *venerabilis, sed humanus, comis & integer, officiosus denique & humilis, postremò acer & vehemens, mansuetus nihilominus ac iucundus*. Sed ô breuem hominis vitam! ô exiguum nimis vitæ curriculum! ô miseram humanæ naturæ conditionem! Tali viro, qui clarissimum virtutum omnium speculum,

lum, & verissimum oculati ac vigilantis Episcopi exemplar erat atque idæa, frui diutiùs non licuit? Meditabatur & alia multò præclariora ad publicum Religionis bonum; atque ipso etiam die, quo ad meliorem vitam Deus euocauit, cum Illustriss^{mis} & Reuerendiss^{mis} Nuntio Apostolico GVIDONE BENTIVO-

LIO Rhodienfium ac MATTHIA HOVIO Mechlinienfium Archiepiscopis super ea re prolixè communicarat. Decebat scilicet generosum ac strenuum militem in ipsa actione à Deo euocante deprehendi. Obiit Obiit Brun-
xella 12. Ian-
nuar. 1611. anno ætatis quinquagesimo primo, sibi quidem suo tempore, (vt qui non nisi ad cælestia anhelaret) sed Ecclesiæ Dei laboranti nimis præproperè. Adeò verum illud, *Optima quæque in terris diu perennare non posse.*

Te igitur appello, PRAESVL OPTIME: quando hoc in more positum est, vt qui benè de Ecclesiâ,

benè de Republica meriti sunt, pro funere laudentur ; si cui vniquam Episcopo honor is iustè delatus , si quæ exsequiæ cum lacrymis celebratæ , nulli iustiùs quàm tibi postremum hoc officium omnes debemus. Tu firmissimum Christianæ Religionis præsidium fuisti , terror hæreticorum , refugium miserorum , decus patriæ , lumen sæculi. Vtinam tuarum vestigia virtutum sequamur , morum tuorum integritatem re ipsa exprimamus ; in omnibus denique sic ambulemus , vt ad cælestem patriam aliquando peruenire , atque æterna tecum beatitudine perfrui mereamur.

D I X I.

APPROBATIO.

ORATIONEM hanc in funere
Reuerendissimi Domini IOAN-
NIS MIRAEI, *Quartæ Antuerpien-*
sium Episcopi, habitam à R. D. IOAN-
NE DEL-RIO, Protonotario Aposto-
lico, Ecclesiæ Cathedralis Antuerpiensis
Decano, & Episcopatus eiusdem Vica-
rio Generali, prælo dignissimam iudico:
quæ cum veras defuncti PRAESV-
LIS laudes commemoret, simul præcla-
rum veri Episcopi exemplar aliis imitan-
dum proponit.

Franciscus Haræus S. T. L.
Librorum Censor.



THE UNIVERSITY OF CHICAGO
LIBRARY

